



Sesida dals

11 da favrer 2019

Communitgà ils

13 da favrer 2019

Protocol nr.

77

Dumonda Ulber

concernent ils custs da la IT per la scola populara pervia da l'introducziun dal PI 21

Resposta da la regenza

Tar la dumonda 1: Independentmain da l'introducziun dal Plan d'instrucziun 21 GR (PI21 GR) pretendan ils svilups socials en il sector da medias e d'informatica che las scolas fetschian adattaziuns en quest sector.

Dapi il settember 2018 è avant maun en tut las trais linguas chantunalas il manual "Medias ed informatica" ch'il departament d'educaziun, cultura e protecziun da l'ambient (DECA) ha relaschà per incumbensa da la cumissiun per furmaziun e cultura (CFC) (cf. incumbensa da la CFC concernent in concept dad ICT per la scola populara dal chantun Grischun). Quest manual ademplescha quatter funcziuns principalas:

- Per mauns da las scolas sclerescha el la dumonda, co che medias ed informatica pon promover sco er facilitar l'emprender, ed el definescha las prescripziuns generalas per concepir l'instrucziun da medias e d'informatica tenor il PI21 GR.
- El furma la basa concepziunala per las furmaziuns supplementaras obligatorias en il rom da la realisaziun dal PI21 GR, cun las qualas l'uffizi per la scola populara ed il sport (USS) ha incumbensà la scola auta da pedagogia dal Grischun.
- El descriva las premissas che las scolas ston ademplir per pudair realisar il plan d'instrucziun dal modul "medias ed informatica" dal PI21 GR e serva pia als portaders da scola sco basa per elavurar in agen concept da medias e d'informatica.
- El cuntegna las recumandaziuns dal DECA als portaders da scola areguard l'equipament dad ICT en las scolas. Quellas èn divididas en dus terms: avust 2018, cur ch'il PI21 GR damenta liant, ed avust 2021, cur che la realisaziun dal PI21 GR vegn terminada.

Las recumandaziuns areguard l'equipament resguardan ina inventarisaziun da l'equipament dad ICT en las scolas popularas grischunas ch'il USS ha realisà dus onns avant l'introducziun dal PI21 GR (2016). Questa inventarisaziun ha revelà grondas differenzas tranter ils portaders da scola en quest regard. Il basegn d'acquisiziun è

perquai medemamain fitg different. Plinavant fan intgins purtaders da scola investi-ziuns che surpassan ils standards minimals recumandads dal chantun. Ina cumparegliaziun dals custs tranter ils purtaders da scola na fiss perquai betg expressiva, uschia ch'il chantun na registrescha naginas cifras correspondentas.

Tar la dumonda 2: Actualmain na poi betg anc vegnir ditg, tge che po vegnir finanzià sur il credit d'impegn da 40 milliuns francs per in stausch da digitalisaziun en il chantun Grischun. Il credit n'è betg anc disponibel; per quest intent ston esser avant maun l'emprim las basas per crear e per utilisar il credit. Il chantun elavura actualmain ils documents da consultaziun correspondents.

Tar la dumonda 3: Per contribuziuns unicass e periodicas al support da las installaziuns dad IT mancan las disposiziuns legalas correspondentas en la lescha da scola. Quellas stuessan l'emprim vegnir stgaffidas. Plinavant vegni renvià a la resposta da la dumonda 2.

Tar la dumonda 4: En il rom da la realisaziun dal PI21 GR survegnan ils purtaders da scolass grischunas – dapi il cumenzament da l'onn 2017 – il sustegn dal chantun en furma da furmaziuns supplementaras obligatorias en "medias ed informatica" per tut las persunas d'instrucziun pertutgadas

Persunas d'instrucziun da la scolina e da la scola primara che n'instrueschan betg il rom "medias ed informatica", frequentan ina furmaziun supplementara d'in mez di en "medias ed informatica". Quai è circa 750 persunas d'instrucziun. Per las circa 250 persunas d'instrucziun da la scola primara ch'instrueschan il rom "medias ed informatica", dura la furmaziun supplementara trais dis. Var 350 persunas d'instrucziun dal stgalim secundar I ch'instrueschan il rom "medias ed informatica", frequentan ina furmaziun supplementara d'in di.

Quai vul dir ch'il chantun finanziescha occurrenzass obligatorias da furmaziun supplementara en la dimensiun da var 155 000 francs en il sector da medias e d'informatica durant la fassa da realisaziun dal PI21 GR (2016–2021). En quest sector pon ils purtaders da scola ultra da quai frequentar ina furmaziun supplementara d'in di entaifer la scola sin custs dal chantun.



En num da la Regenza

Il president:

Il chancelier:

Dr. Jon Domenic Parolini

Daniel Spadin